



COMUNU DE SU MASU

PORTALITU DE SA LÌNGUA SARDA - 2024

INTERVISTA

Sa die 04 de mesi de Triulas 2024 su operatori de su Portalitu de sa Lìngua Sarda atòbiat Claudia Caredda, ghia turìstica de su territòriu de Su Masu.

Claudia Caredda est una fèmina masesa chi traballat in Su Masu e in giai totu sa Sàrdinnia e chi antis de traballai at studiai me in sa Universitàdi de Casteddu e me in La Sapienza de Roma, aundi at acumpriu du cursu de Lìngua e Comincatzioni e otènniu sa laurea de segundu livellu.

1 – Saludi Claudia, bona die e benibenia me in su Portalitu de Su Masu. Gràtzias po ai torrau sceda a custu atòbiu po si contai unas cantu de cosas de Su Masu e de tui etotu. Duncas, cumentzaus de tui! Nara mi, ita as studiau e cali fiant is progetus cosa tua antis de sa laurea, a pipia e a is tempus de sa Universitàdi? Ita boliast fai a manna? Cali fiant is pensus e fintzas is bisus cosa tua?

Bona die e gràtzias po sa intervista. Comenti as nau tui, apu studiau pruschetotu comunicatzioni, ca est una parti de fundamenta de su traballu miu. Candu deu femu piciochedda e bivia in Su Masu su bisu miu fiat de mi bessiri scriidora e a sa fini apu fatu cussu puru, mancari mai emu ai pensau de acabai a fai sa ghia turìstica e, a pretzisu, de traballai fintzas in Su Masu.

2 – Tennis unu amentu a pretzisu de sa Universitàdi chi bolis cumpartzidi o chi ti àndat a ddu contau a is àterus?

In “La Sapienza” femu connota de is professoris comenti sa de Casteddu, ca arribamu sèmpiri pustis de sa ora po mori de su perèchiu, de su trenu e fintzas de su postali. Custu, ca ndi benimu de sa Sàrdinnia e mi tocàt biaxiai movendi de sa Isula, duncas mancari mi ndi pesamu a is cuàturu de mengianeddu chitzi, sèmpiri sa ùrtima a ndi lompi fia!

3 – Candu e comenti ti ses incarrerada in custa faina de operadora de sa cultura?

A is tempus de sa Universidadadi, candu pensendi a su benidori femu pensamentada de passai sa giovunesa a intregai curriculum, e po no ddu fai, cun una amiga mia, emus pensau de aberri una atividadi turìstica, sendi ca in Casteddu no ci fiat meda organizazioni turìstica.

4 – Ti pensas ca sa stòria e su territòriu de Su Masu ddus connoscint po beni?

Po nudda, siat is masesus siat is de is biddas a ingìriu e is de Casteddu.

5 – Is masesus, a parri tuu, dda connoscint sa stòria issoru e is logus e testimonias de sa cultura?

A parri miu, is masesus prus ativus in su territòriu, comenti is ca pigant parti a sa vida culturali de sa bidda, connoscint una stòria donniunu a manera sua e donniunu una parti bera e pretziosa de Su Masu, perou no tenint unu sciri generali e cumpartziu, comenti si fessit unu puzzle de torrai a cumporriri. Dònna figura rapresentat duncas unu scixuxu de cumpartziri cun sa Comunitàdi.

6 – Ddoi est una cosa a pretzisu de Su Masu chi ti àndat a dda contai prus de is àteras? Conta mi una crosidadi o una cosa de importu chi meda genti no sciet!

Mi praxit contai sa relata chi sa bidda at tentu in su tempus colau cun su stangioni, poita sa laguna est sèmperi stètia, fintzas in su Noixentu, su tzentru de sa bida econòmica e culturali de Su Masu. Sa cosa chi pagu genti sciet, est sa òrigini de su ddi nant "*Pino Solitario*" (su opinu a sa sola), no tenemus sa seghesa ma est dàbili ca ddu iant prantau in su interi de is bonificas fascistas, e duncas, si est berus, tenit chentu annus; nisciunu ddu sciet mancarì est de importu sendi custu unu de is sìmbulus de sa bidda. Custu est su chi mi agradat de prus a contai a genti.

7 – Sendi tui una sperta manna a berus, ita as fatu e ita fais oi in die po studiaì su territòriu e sa stòria cosa sua? Fait a scoviai?

Mi praxit auniri su stùdiu de is liburus cun su sciri de is personas ca bivint in su logu e ca tenint sèmperi calancuna cosa ca is liburus non ti podint nai. Su de importu est a verificai is informatzionis e èssiri capassus de stesiai sa storia de sa paristòria, arregordendi si ca fintzas sa paristòria podit chistionai de su logu e de sa stòria sua.

- Su fueddu paristòria in italianu est "legghenda".

8 – Cali est sa cosa prus bella de bisitai in Su Masu e cali est sa cosa chi iat tocai a dda avalorai de prus?

Su complessu de Santa Caterina est spantosu e finzas de importu poita rapresentat unu tanti de sa stòria giudicali ca no sciemu giai nudda. Est de importantu a dda amparai e avalorai. Fintzas sa zona de giliàcuas, ca est sa ùnica parti de sa stangioni de Santa Igia aundi fait a dda bisitai.

9 – A parri miu, e fintzas a dolu mannu, sa bidda o citadi de Su Masu, is sardus non dda connoscint aici beni. Mancai ddoi at momumentus meda de bìdiri, testimonias manna e una stòria meda prus àntiga de àteras biddas meda. Poita?

Ca est tropu acanta de sa citadi de Casteddu. E poita in sa stòria contemporanea sa atividadi fitiana est sa de su aeroportu, e duncas totucantus nci passant po andai e torrai, sceti ca nemus si stentat is su territòriu.

10 – A ùrtimu, una pregunta libera! Nara mi tui una cosa chi non eus nau e chi tocat a dda nai...

Deu pentzu ca Su Masu est una bidda manna cun meda bariebadi de personas chi sikhint a scriri sa stòria de sa bidda oi etotu: nci funt medas assòtzius culturalis, sportivus, de voluntariu e medas eventus ca amostant su impinnu e su sentidu de custus de agiudai e avalorai sa vida de sa Comunità. At a tocai a ddas auniri e ddas fai atobiai a totucantus a custas personas e is calidadis issoru, po afortiai sa identidadi culturali e su sciri de is masesus.







